

Iyoni Yana Leta Nagona Givetokilumina

Kivemala

Yeisu gilaka gabameya muline, malamala sikisiti (60) giavaidi ada Iyoni, banae Yeisu yana tonogala seyana ani Efeso wagaine gimiyamiya aku yana leta nagona taidei givetokilumi ginau tovetumagana badi imiyamiya Eisiya anafafaliya. Kaduwe, Iyoni buki-dina givetokilumidi adiyegana Valeya Iwakana Iyoni Givetokilumina, ada kaduwe Yeisu Keliso Yana Ivemogatala.

Leta taidei wagaine Iyoni yana nuwanuwa iluwe i giseyegemonedi. Seyana ani tovetumagana giluwageyedi toyogina e ada ina mididi Yaubada ke Natuna Yeisu Keliso gagana faidiya. Bademowa taudiyavo iawaegedi Yaubada wagaine ke inuwakabubuyena, e ada adilaubodamowa ke ina venuwakabubu seyana seyana. Yana nuwanuwa anavelu ani tovetumagana givonamatawedi tovewala fwayafwaya faidiya. Taidei tovewala-dina ani ivevewala sidamana, ivonavona, “Vovoda ani keke tamo wa adiiwakana, ada wagaidiya-deya koyona gagana giyegeyegemonona wagaideya. Tainei faina Keliso anaita ani velemonoena kaliva, aku keke velemonoena. E ada Banae keke velemonoena Yaubada Natuna.” Kaduwe tovewala-dina ivetumagana vaita alamana gaitoma lakaina aku nuwakabubu ani keke. Taide tovewala-dina ani Keliso nibainavo, e ada Iyoni

yadi fwaya-dina giivemogatalidi Yaubada yana vewala velemonoena wagaine.

Vona wayawaina. (1:1-4)

Yaubada Tauna malina, ada kana miyamiya wagaine. (1:5 - 2:17)

Matawa gimaduyegemona Keliso nibainavo faidiya. (2:18-29)

Ideyavo ani Yaubada natunavo, e ada kanamiya anafaiweya. (3:1 - 4:6)

Yaubada ide ginuwakabubuyeda e ada gilubodada ide kaduwe kaliva kana nuwakabubuyedi. (4:7-21)

Vetumagana Yaubada Natuna wagaine. (5:1-12)

Vona anaebalaubyabu. (5:13-21)

Vona wayawaina.

¹ Vona Banae Wayawaina[†] gimiyamiya ebavevuvu velemonoena wagaine ani bademowa taumeyavo anogalina, matameya aitana ke amatawabuwbuyena, ada nimama asena wagaine.**

² Yawai-nai Tauna giivemogatalina ke ime aitanana,[†] ada Banae faine aifufuyena ke aawatalatalainena wagaimiya, Tauna Banae Yawai-vagata. Yaubada Tamada nodi imiyamiya ani Tauna giivemogatalina wagaimiya.

³ Ada gavana aitana ke anogalina ani aawamogatalena wagaimiya, e ada kadu imi nodi

[†] 1:1 Iyo 1:1,4 ** 1:1 Muliya-yo Iyoni leta-nai givetokilumina, banae afositoloyavo nodi Yeisu iitana velemonoena. [†] 1:2 Iyo 1:14

kana vetubuiyana. Ada velemonoena yada vetubuiyana ani Tamada ke Natuna Yeisu Keliso nodi.

⁴ Taidei avetokiluma wagaimiya e ada yama vemwamwala gina tubuga velemonoena.

Yaubada Tauna malina, ada kana miyamiya wagaine.

⁵ Ifufu taidei anogalina Yeisu wagaine ada aawatalatalaina wagaimiya, ani Yaubada Tauna malina,[†] ada yuyuvana ani au keke-mowa Banae wagaine.

⁶ Kai ide kavona evona Yaubada nodi kavetubuiyana aku yada dewa ani yuyuvana wagaine kanunudadana,[†] ina ideyavo ani tovefwayafwaya, ada yada vona ke yada gugai wagaidiya nuwanuwa velemonoena keke kada mulimuliye.

⁷ Aku Yaubada malina wagaine gimiyamiya. E ada kai ide kadu Banae anafaiweya malina wagaine kanunudadana,[†] aga kavetubuiyana tauveyavo wagaideya, ada Natuna Yeisu dayagine gikiveyegayegada koyona matatabuna wagaidiya-deya.[†]

⁸ Kai ide kanavona, “Keke tamo koyona wagaideya,” wada tauda kafwayanegenegeda ada vona anavelemonoena ani keke wagaideya.

⁹ Aku kai yada dewa koyodi kana awatalatalaina Yaubada wagaine, aga yada koyona gina venuwaegedi ke gina kiveyegayegada yada dewa bwanene matatabuna wagaine. Faina

[†] 1:5 Iyem 1:17, 1Tim 6:16 [†] 1:6 Iyo 12:35-36, 1Iyo 2:4 [†] 1:7 Ais 2:5 [†] 1:7 Ibel 9:14, 1Pi 1:18-19, Ive 5:9, 7:14, 12:10-11

anafaiweya Banae givona, gina gugai, ada anafaiweya yana nuwanuwa tunutunugina, ginadewa tunutunugina.

¹⁰ Kai ide kanavona, “Keke tamo kada koyona,” aga Yaubada kasesena vaita Banae tofwaya, ada yana vona velemono keke gida miyami aseaseda wagaidiya.

2

¹ Natukuweyavo, taidei gavetokiluma wagaimiya e ada keke wanadewa koyona. Aku kai tamo gaito gina koyona, aga ada Tolubadigolagola gimiyamiya, Yeisu Keliso. Banae Toyegayegana, ada Tamada wagaine giveveola faideya.†

² Banae Tauna bolavoi-menai, ada yada koyona faina gifatana e ada Yaubada yana nuwakoyo yada koyona faine ani nuwana gibubuna.† Ada keke ide yada koyona gaga faine gida alika, aku kaduwe babi matatabuna anakalivayavo yadi koyona faidiya gialika.†

³ Kai Yaubada yana veimeya kamatawalewaleyena, aga kana alamanena velemono ani ide Banae kaalamanena.

⁴ Gavakaliva gina vonavona, “Iya Yaubada gaalamanena” aku yana veimeya keke gida itaveyabi, kaliva tainei ani tovefwayafwaya, ada vona anavelemono keke tauna wagaine gida miyami.†

⁵ Aku kai gaito Yaubada yana vona gimatawalewaleyena, vona velemono banae ani Yaubada

† 2:1 Lom 8:34, 1Tim 2:5, 1bel 7:25, 9:24 † 2:2 Lom 3:25, 1Iyo 4:10 † 2:2 Iyo 1:29, 11:52 † 2:4 1Iyo 1:6,8

yana nuwakabubu givekaliva yawaina wagaine.†
Taidei wagaine kaalamanena ani kamiyamiya
Yaubada wagaine.

⁶ Kai gaito ginavona, “Iya Yaubada wagaine
gamiyamiya,”† gilubodana banae ginadewa
anafaiweya Yeisu gidewa.†

*Kaliva kana nuwakabubuyedi ke kana miyamiya
malina wagaine.*

⁷ Tubuiya aseasekuweyavo, keke vaita veimeya
evaguna gada vetokilumi wagaimiya,† aku
veimeya tuwaina faina gavetokiluma, tainei
ebavevuvu wagaine gimiyamiya wagaimiya.
Veimeya taidei tuwaina ani anaifufu bademowa
wanogalina.

⁸ Aku kaduwe veimeya taidei vaita evaguna.
Ada veimeya-nai ananuwanuwa tunutunugina
iitana Banae Keliso wagaine ke imi wagaimiya,
faina yuyuvana giavavaina aku malina vele-
moena bademowa gituituimalina.†

⁹ Gaito ginavona, “Iya gamiyamiya malina wa-
gaine” aku tubuiyana giagougena, ina banae
aimo yuyuvana wagaine gimiyamiya.†

¹⁰ Gavakaliva tubuiyana ginuwakabubuyena
ani banae gimiyamiya malina wagaine, ada
nuwainagena wagaine keke tamo gavavuvu
gida miyami ke ginabe koyona wagaine.†

¹¹ Aku gaito tubuiyana giagougena,
banae yuyuvana wagaine gimiyamiya ada
ginunudadana yuyuvana wagaine. Keke

† 2:5 Iyo 14:21,23, 1Iyo 4:12, 5:3 † 2:6 Iyo 15:4-5,7-8 † 2:6 Iyo
13:15 † 2:7 Iyo 13:34, 2Iyo 1:5-6 † 2:8 Iyo 1:9, 8:12 † 2:9 1Iyo
3:10,15, 4:20 † 2:10 Lom 14:13

gida alamane gadedeku ginauna, faina yuyuvana matana gisebodana.

¹² Natukuweyavo, gavetokiluma wagaimiya faina Yaubada yami koyona givenuwaegena Keliso wagaine.

¹³ Imi kamakuweyavo, gavetokiluma wagaimiya faina bademowa waalamanena Yeisu, Banae tova nagona ehavevuvu velemono wagaine gimiyamiya.

Imi kaikuweyavo, gavetokiluma wagaimiya faina kaliva koyona Seitani wagaine bademowa walugaviya ke watoyogisegena.

Kaduwe natukuweyavo, imi wagaimiya gavetokiluma faina Tamada waalamanena.

¹⁴ Imi kamakuweyavo, gavetokiluma wagaimiya faina bademowa waalamanena Keliso, Banae ehavevuvu velemono wagainedeya gimiyamiya-vagata.

Imi kaikuweyavo, gavetokiluma wagaimiya faina toyogimiyavo, ada Yaubada yana vona gimiyamiya aseasemiya, ada kaliva koyona Seitani wagaine walugaviya ada watoyogisegena.**

Babi ananuwanuwa keke nuwami ginadola.

¹⁵ Babi ananuwanuwa ke anakaikaiwabuyavo ani keke nuwami ginadola.† Kai gaito babi ananuwanuwa nuwana gidolana, aga Tamada ananuwakabubu ani keke gida miyami wagaine.

** **2:14** Maita 12-14 ani 'natukuweyavo' ananuwanuwa anavelu anafaiweya 'tovetumagana evagudiyavo', 'tama' anafaiweya 'tovetumagana toyogina,' ada 'kaikuweyavo' anafaiweya 'tovetumagana galuvaluva'. † **2:15** Lom 8:7, 12:2, 2Tim 4:10, Iyem 4:4

16 Faina dewa moyaina babi wagaine imiyamiya, anafaiweya kaliva vovodi ananuwanuwa koyodi inuwanuwayedi,† gavana gavana faidiya matadi iitaitavedigaga,† ada kadu gavadi moyaidi faidiya taudiyavo adiyegana ikikilakaina. Taidei gaitoma-dina keke idaela Tamada wagaine aku matatabuna ielai babi ananuwanuwa koyona wagaine.

17 Ada babi anakalivayavo keke Yaubada ida vemoimoine kadu yadi nuwanuwa luvadiga ani iavavaina, aku badi gavega Yaubada yana nuwanuwa igugaiyena ani ina miyamiya-vagata.

Matawa gimaduyegemona Keliso nibainavo faidiya.

18 Natukuweyavo, tova anaebalauyabu givelilivana. Ada anafaiweya bademowa wanogalina vaita Keliso Nibaina gina yegemona, ani malinai bademowa Keliso nibainavo moyaidi iyege-mona.† Taidei wagaine kaalamanena tova anaebalauyabu bademowa gielai.

19 Kaliva-dina taidei keke velemonoena ide tovetumagana yada yoo wagaine, e ada isegeda inau.† Kai badi velemonoena yada yoo aga ida miyamiya wagaideya. Aku yadi nau-nai givewaleda vaita badi moyaidi keke ide yada yoo wagaine.

20 Aku imiyavo ani Yaubada Tabutabuna Aluwaluwana gibiwana wagaimiya, e ada moyaimi vona velemonoena waalamanena.

21 Taidei faina Iya gavetokiluma wagaimiya, keke vaita vona velemonoena keke wada alamane

† 2:16 Lom 13:14, Efes 2:3, 2Pi 2:18 † 2:16 Tol 4:8, 5:11 † 2:18 1Iyo 4:3, 2Iyo 7 † 2:19 Gug 20:30

faine, aku velemono ana waalamanena. Ada kaduwe faina waalamanena ani Yaubada yana vona velemono wagaine keke tamo fwaya gida elaela.

²² Aku gaito tovefwayafwaya? Tainei gaito banae gina veweyena Yeisu evona keke Keliso.† Kaliva-nai ani Keliso nibaina, banae giveweyena Tamada ke Natuna.

²³ Badi gavega iveveweyena Yeisu aga ina Tamada keke gida miyami badi wagaidiya.† Aku gavega ivonavonamogatala Yeisu Banae Yaubada Natuna, ina badi wagaidiya kaduwe Tamada gimiyamiya.

²⁴ Aku imiyavo ani wana itaveyabimi ada gavana nagona wanogalina ani wana duveyalaina aseasemiya. Kai gavana nagona wanogalina ani gina miyamiya aseasemiya, aga imiyavo tova moyaina wana luveyabina Tamada ke Natuna wagaidiya.

²⁵ Ada taidei luveyabina-nai wagaine yawai-vagata kanuwanuwagana,† anafaiweya givonadabadabayena.

²⁶ Gaitoma-dina taidei gavetokiluma wagaimiya, faina biyavo-dina ibalabalalava ina fwayanegenegemi yadi vewala balana wagaine.

²⁷ Aku Keliso Aluwaluwa Tabuna gibiwana wagaimiya e ada tova moyaina Banae gimiyamiya wagaimiya. Taidei faina keke wana nuwanuwa vaita seyana gaito gida vevewalemi, faina Banae Aluwaluwa-nai gaitoma matatabuna giveve-

† 2:22 1Iyo 4:3, 2Iyo 7 † 2:23 Mad 10:32-33, Iyo 5:23, 2Iyo 9

† 2:25 Iyo 3:14-15, 6:40, 17:1-2

walemi.† Ada yana vewala ani vona velemonoena, keke tamo fwaya wagaine. Ada anafaiweya givewalemi, wana miyaveyalata Banae Keliso wagaine.

28 Ada natukuweyavo, tova moyaina wana miyaveyalata Banae wagaine e ada tova-nai gina yegemona, ide wa yada asevatu keke kana vovomumu Banae matane yana ela-nai wagaine.†

29 Imi waalamanena ani Keliso Banae yegayega-moena, e ada anafaiweya kaduwe wana alamanena gavega idewadewa yegayegana, badi Yaubada wagaine itubuga.†

3

Ideyavo ani Yaubada natunavo, e ada kanamiya anafaiweya.

1 Wana itana nuwakabubu taidei gavatubuga Tamada gibiwana wagaideya e ada givewagada 'natunavo'!† Ada velemonoena ideyavo Yaubada natunavo! Aku tomiyababi moyaidi keke nuwadi gidamali vaita ide natunavo, faina keke Yaubada ida alamane.†

2 Tubuiya aseasekuweyavo, ika, malinai ideyavo ani Yaubada natunavo, ada aimo keke gida mogatala wagaideya gavaiyamu gina sevedavedamede. Aku kaalamanena ani tova-nai Keliso ginayewa-vagilena, ideyavo anafaiweya Tauna,† faina Tau-moena kana itana anafaiweya gimiyamiya.

† 2:27 Iyo 14:26 † 2:28 1Iyo 4:17 † 2:29 1Iyo 3:10 † 3:1 Iyo 1:12-13 † 3:1 Iyo 16:3, 17:25 † 3:2 2Kol 3:18

³ Ada gavega nuwanuwami Keliso anaitaita anafaiweya amiita gina yegemona ani faina wanuwavetumagana.[†] Ada Banae yegayegamoena anafaiweya, imi seyana seyana tauna yawaina gikikiveyegayeganena.

⁴ Aku badi gavega ikoyokoyona aga Yaubada yana veimeya iyaweyawelina. Ada velemoena dewa koyona ani veimeya anaiyawela.

⁵ Aku waalamanena ani Keliso giobuelai ke kaliva yada koyona gina vaiyavulena faina.[†] Ada Banae wagaine keke tamo koyona gida miyami.

⁶ Gaito gimiyaveyalata Keliso wagaine ani keke gida koyona-vavagila. Aku gaito gikoyonavavagila, keke-mowa Keliso gida itainana o gida alamane.

⁷ Natukuweyavo, keke wana awaege seyana gaito gina fwayanegenegemi. Tauna gaito tova moyaina yana dewa yegayegana, banae toyegayegana anafaiweya Keliso Banae Toyegayegana.[†]

⁸ Aku banae gaito tova moyaina gikoyokoyona, ina banae Seitani yana kaliva,[†] faina tuwaimoena babi anaebavevuvu wagaine-deya Seitani banae gikoyokoyona ada gielai tova malinai. Taidei vuvuna Yaubada Natuna giobuelai ani Seitani yana gugai gina luyawelidi.

⁹ Badi gavega Yaubada wagaine itubuga ani keke koyona ida faifaisewa ayo ida naunauwe tova manamanawena, faina Yaubada yawaina

[†] **3:3** Lom 15:12 [†] **3:5** Ais 53:11-12, Iyo 1:29, 2Kol 5:21, Ibel 9:26, 1Pi 2:22-24 [†] **3:7** 1Iyo 2:29 [†] **3:8** Mad 13:38

gimiyamiya wagaidiya. Keke adifata ina koyona-vavagila, faina Yaubada wagaine itubuga.†

10 Gavaiyamu kana alamane gavega Yaubada natunavo ada gavega Seitani natunavo? Kai kaliva yana dewa keke yegayegana, banae keke Yaubada natuna. Kadu kai kaliva tubuiyana keke gida nuwakabubuye, banae keke Yaubada natuna. Taidei anafaiweya kana alamanena.

Moyaida kana venuwanuwakabubu.

11 Faina taidei valeya-nai wanogalina nago-moena wagaine, ani adalauboda moyaida kana venuwanuwakabubu.†

12 Keke Keni Adama natuna anafaiweya kanadewa, banae Seitani yana kaliva ada anatubuluga giluvealikana.† Aku gavana faina taina giluvealika? Faina tauna yana gugai ani koyona aku taina yana gugai tunutunugina.

13 E ada tubuiyakuweyavo, kai tomiyababi ina agougemi aga keke wana tataweyana.†

14 Gavaiyamu kana alamane alika anawai kasegena aku kadamana yawai-vagata anawai?† Taidei anafaiweya. Tubuiyadeyavo kanuwak-abubuyedi. Gavega keke ida nuwakabubu, ina badi inaunau alika anawai wagaine.

15 Gavega tubuiyadi wagaine iagouga ani badi toluvealika,† ada waalamanena toluvealika ani keke yawai-vagata anawai wagaine ida nauna.

16 Ada gavaiyamu nuwakabubu anadewa kana alamane? Keliso yawaina giawaegena

† 3:9 1Iyo 5:18 † 3:11 Iyo 13:34-35 † 3:12 Eba 4:4,8, Ibel 11:4, Iyud 11 † 3:13 Iyo 15:18-21 † 3:14 Iyo 5:24 † 3:15 Mad 5:21-22

ide faideya.† Ada ideyavo kaduwe gilubodada taudehyavo yawaida kada awaegena tubuiyadeyavo faidiya. Taidei anafaiweya kana alamanena.

¹⁷ Aku kai gaito seyana wa yana lokoloko ada gina itana tubuiyana ani lema gilubodana aku keke gida nuwakalikaliye ada gidaleme,† aga Yaubada ananuwakabubu keke banae wagaine.

¹⁸ Natukuweyavo, keke kana nuwakabubu vona gaga wagaine, aku kana nuwakabubu velemonoena wa yada gugai nodi.†

¹⁹ Taidei gugai-nai wagaine kana alamanena ideyavo kamiyamiya vona velemonoena wagaine, e ada aseaseda gina kivevatuna Yaubada matane.

²⁰ Gavatoveya nuwainagedeya kanuwanuwa vaita ide kakoyona, aga nuwada gina niwalova, faina Yaubada gialamaneda velemonoena aku yada nuwanuwa kabisona.

²¹ Tubuiyakuweyavo, kai nuwainagedeya kalutovonina vaita yada dewa moyaina yegayegana Yaubada yana nuwanuwa anafaiweya, aga wa yada asevatu kamiyamiya Yaubada matane.

²² Ada kaduwe gavana kana veolena, tainei kana nuwagana Banae wagaine, faina yana veimeya kamatawalewaleyena ada kagugai gavana anafaiweya yana nuwanuwa.†

²³ Ada taidei yana veimeya, ani Natuna Yeisu Keliso anayegana kana vetumaganena,† ada moyaida kana venuwanuwakabubu† anafaiweya

† **3:16** Iyo 10:11, 15:13 † **3:17** 2Vei 15:7-11 † **3:18** 2Vei 15:7-11, Iyem 2:15-16 † **3:22** Iyo 15:7 † **3:23** Iyo 6:29 † **3:23** Iyo 13:34, 15:12,17

giveimeyeda.

²⁴ Imiyavo gavega Yaubada yana veimeya wamatawalewaleyena ani Yaubada wagaine wamiyamiya, ada Banae gimiyamiya wagaimiya. Gavaiyamu kana alamane Banae gimiyamiya wagaideya? Kaalamanena faina Yaubada Aluwaluwana giveda ke Banae nuwainagedeya gimiyamiya.†

4

Wana itaveyabimi Keliso nibainavo wagaidiya, badi falofita fwayafwaya.

¹ Tubuiya aseasekuweyavo, keke kaliva moyaidi yadi vewala wana madu vetumaganedi vaita wada vona velemono, aku wana galuvaluvana aluwaluwa-nai ivegugaiyena, kai giyegeyegemonona Yaubada wagaine-deya o kai keke. Faina falofita fwayafwaya moyaidi bademowa iyege-monona babi anafafali tulina tulina wagaidiya.†

² Gavaiyamu wana alamane Yaubada Aluwaluwana falofita awane giifuifufuye? Tainei kai ina awamogatala vaita Yeisu Keliso giobuelai ke givekaliva-mowa, aga banae velemono Yaubada wagaine.†

³ Aku gava aluwaluwa kaliva-nai wagaine gina awamogatala vaita Yeisu keke gida obuela ke gida vekaliva-mowa, tainei aluwaluwa-nai keke gidaela Yaubada wagaine aku banae Keliso nibaina wagaine.† Bademowa wanogalina vaita ginaelai, ada velemono malinai bademowa giela gimiyamiya babi matatabuna wagaine.

† 3:24 Lom 8:9 † 4:1 Mad 24:11 † 4:2 1Kol 12:3 † 4:3 2Iyo 7

⁴ Aku natukuweyavo, imiyavo Yaubada yana kalivayavo, ada falofita fwayafwaya watoyogisegedi. Faina Aluwaluwa Tabuna gimiyamiya wagaimiya ani toyogi-moena aku banae aluwaluwa-nai koyona kaliva moyaidi imuliyena, yana toyogina keke anafaiweya.

⁵ Badiyavo falofita fwayafwaya ani babi anakalivayavo, tayuwe faina iifufu babi ananuwanuwa wagaine, ada tomiyababi yadi nuwanuwa ivenogalena.†

⁶ Aku ideyavo ani Yaubada yana kalivayavo. Gavega Yaubada ialamanena, bonada ina venogalena, aku gavega keke Yaubada yana kaliva, keke bonada ida venogale.† Taidei anafaiweya kana itainanana Aluwaluwa Tabuna Bana yana vewala vuvuna ani vona velemonoena, ada aluwaluwa koyona bana yana vewala ani vuvuna vefwayafwaya.

Yaubada ide ginuwakabubuyeda e ada gilubodada ide kaduwe kaliva kana nuwakabubuyedi.

⁷ Tubuiyakuweyavo, moyaida kana venuwanuwakabubu, faina nuwakabubu gielaelai Yaubada wagaine. Ada gaito kaliva ginuwanuwakabubuyedi, banae gitubuga Yaubada wagaine ada gialamanena Yaubada.

⁸ Gaito keke kaliva gida nuwanuwakabubuyedi, keke gida alamane Yaubada, faina Yaubada Tauna ani nuwakabubu vuvuna.

⁹ Gavaiyamu Yaubada yana nuwakabubu ide wagaideya giseyegemone? Natuna tubueyana

† 4:5 Iyo 15:19 † 4:6 Iyo 8:47

giimilina babi wagaine† e ada Tauna wagaine yawai-vagata kana miyanena.

¹⁰ Nuwakabubu vuvuna anaitaita taidei anafaiweya. Keke vaita ide Yaubada kanuwakabubuyena, aku Tauna ide ginuwakabubuyeda ada Natuna giimilina ke gina alika ide faideya yada koyona analaufata faina. E ada taidei vebolavoi-nai wagaine Yaubada yana nuwakoyo yada koyona faine ani nuwana gibubuna.†

¹¹ Tubuiya aseasekuweyavo, taidei anafaiweya Yaubada ide ginuwakabubuyeda lakaina faina, ide gilubodada kaduwe moyaida kana venuwanuwakabubu.†

¹² Keke tamo tova gaito Yaubada gidaita,† aku kai moyaida kana venuwanuwakabubu aga Yaubada gimiyamiya wagaideya, ada yana nuwakabubu wagaideya ani kaseseyegemonena velemonoena.

¹³ Banae Tauna Aluwaluwana giveleda, e ada taidei wagaine kaalamanena ideyavo kamiyamiya Yaubada wagaine ada Banae gimiyamiya wagaideya.†

¹⁴ Ada Tamada Natuna giimilina kaliva moyaida gina kibababaleda,† ani aitana ke aawatalatalainena.

¹⁵ Gaito gina awamogatala vaita Yeisu Banae Yaubada Natuna, aga Yaubada gimiyamiya wagaine ada banae gimiyamiya Yaubada wagaine.

¹⁶ E ada ide kaalamanena ke kavetumaganena ani Yaubada ginuwakabubuyeda. Yaubada Tauna ani nuwakabubu vuvuna, ada badi

† 4:9 Iyo 3:16 † 4:10 Lom 5:8-10 † 4:11 Iyo 15:12 † 4:12 Iyo 1:18 † 4:13 2Kol 1:21-22 † 4:14 Iyo 3:17

gavega imiyamiya nuwakabubu wagaine ani kadu imiyamiya Yaubada wagaine, ada Yaubada gimiyamiya wagaidiya.

¹⁷ Taidei wagaine yana nuwakabubu gitubugamowa wagaideya. E ada vonayavuga anatova wagaine kana asevatu, faina babi taidei wagaine bademowa ide anafaiweya Keliso.

¹⁸ Gavakaliva Yaubada yana nuwakabubu banae wagaine gilulutovonina, ina keke gina matamatauta. Ada Yaubada yana nuwakabubu velemoena banae wagaine faina, matauta givenegana. Gavakaliva gimatamatauta, yana matauta vuvuna ani ginuwanuwa kai Yaubada gina vematavulogina. E ada yana matauta faina, nuwakabubu keke gida luyabu banae wagaine.

¹⁹ Yaubada nagona ide gimadunuwakabubuyeda.[†] E ada ide adalauboda Banae kana nuwakabubuyena, ada kaduwe kaliva kana nuwakabubuyedi.

²⁰ Kai gaito gina vonaga, “Iya Yaubada ganuwakabubuyena” e aku tubuiyana wagaine giagouga, ina banae tovefwayafwaya. Faina gaito tubuiyana matane giitaitana aku keke gida nuwakabubuye, aga keke anafata Yaubada gina nuwakabubuye, Banae keke gida itaita.

²¹ Ada veimeya taidei Yaubada giveleda, ani gavega inuwakabubuyena Yaubada, adilauboda kaduwe tubuiyadiyavo ina nuwakabubuyedi.

5

[†] 4:19 1Iyo 4:10

Vetumagana Yaubada Natuna wagaine.

¹ Badi gavega ivetumaganena Yeisu au Keliso† ani badi kaliva-dina Yaubada wagaine itubuga. Ada gavega inuwakabubuyena Tamada ani kaduwe natunavo Bana wagaine itubuga inuwakabubuyedi.

² Gavaiyamu kana alamane Yaubada natunavo kanuwakabubuyedi? Kai Yaubada kanuwakabubuyena ada kadu yana veimeya kamatawalewaleledi.

³ Faina yada nuwakabubu Yaubada wagaine ani taidei anafaiweya. Yana veimeya kamatawalewaleledi. Ada yana veimeya keke vitadi.†

⁴ Faina gavega Yaubada wagaine itubuga ani babi ananuwanuwa koyona itoyogisegenana. Ada gavawai wagaine nuwanuwa-dina kana toyogisege?† Yada vetumagana wagaine.

⁵ Gavakaliva ani babi ananuwanuwa koyona gina toyogisege?† Banae gaito givetumagana Yeisu au Yaubada Natuna.

⁶ Yeisu Keliso ani Banae giobuelai babiya, ada gielai iyaiyaya iluwei wagaidiya, gufa ada dayaga.** Yana ela keke gufa gaga wagaine, aku gufa ada kadu dayaga wagaine. Ada Aluwaluwa Tabuna ani Banae giawaawamogatala anafaiweya,† faina Aluwaluwa Tabuna Banae vona

† 5:1 1Iyo 2:22 ke anaailabama adiebakivemala † 5:3 Iyo 14:15,23-24, Mad 11:30 † 5:4 Iyo 16:33 † 5:5 Lom 8:37

** 5:6 'Yeisu Keliso gielai iyaiyaya iluwei wagaidiya, gufa ada dayaga' ani ananuwanuwa taidei anafaiweya. Yeisu gufa wagaine gibabitaiso ada yana alika kelose wagaine dayagina gimadu.

† 5:6 Iyo 1:32

velemoena.

⁷ Gaitoma toiye iawaawamogatala Banae Yeisu Keliso faine.

⁸ Seyana ani Aluwaluwa Tabuna,[†] anavelu gufa, ada anaveto dayaga. Ada aditoto ivonavona leleleya.

⁹ Kai kaliva-mowa yadi awamogatala kave-tumaganena, aga velemoena Yaubada yana awamogatala kada vetumaganena, faina Tauna Yaubada.[†] Ada Yaubada ani yana awamogatala giveleda Natuna faina.

¹⁰ Badi gavega Yaubada Natuna ivetumaganena ani Yaubada yana awamogatala Natuna faine gimiyamiya aseasedi wagaidiya. Aku gavega keke Yaubada ida vetumagane, badi isesena anafaiweya Yaubada vaita tofwaya, faina keke ida vetumagane Yaubada yana awatalatalaina giveleda Natuna faine.

¹¹ Ada awamogatala-nai ani taidei anafaiweya. Yaubada yawai-vagata giveleda, ada yawai-nai ani Natuna wagaine.[†]

¹² Badi gavega Natuna wagaidiya, ani yawai-vagata imiyamiyanena.[†] Aku badi gavega Yaubada Natuna keke wagaidiya, ani keke yawai-vagata ida nuwaga.

Vona anaebalaulyabu.

¹³ Imi gavega Yaubada Natuna anayeganeya wavetumagana ani yami leta taidei gavetok-ilumina anafaiweya, e ada wana alamane-

[†] 5:8 Iyo 15:26 [†] 5:9 Mad 3:17, Iyo 5:32-37, 8:18 [†] 5:11 Iyo 1:4, 3:36 [†] 5:12 Iyo 3:15, 5:24, 6:40,47

dewedewena bademowa yawai-vagata wanuwigana ke wamiyamiya wagaine.†

14 Kai Yaubada yana nuwanuwa anafaiweya kana veola, aga kanuwaveyalaina vaita gina venogaleda.†

15 Ada kaalamanena givenovenogaleda tova-nai kaveolena faina, kaduwe kaalamanena vaita gavana kaveola wagaine ani bademowa kanuwagana.

16 Kai kana itana tubuiyada tovetumagana gikoyokoyona ada koyona-nai faine keke alika-vagata gina nuwaga, aga tubuiyada-nai faine kada veola Yaubada wagaine ada yawai iwakana gina velen.† Taidei yaku vona-nai ani badi gavega yadi koyona-nai faina keke alika-vagata wagaine inana ani faidiya. Aku tamo koyona ani faine aimo gina nauwedi alika-vagata wagaine, ada keke gada vonavona vaita koyona-nai faine kana veola Yaubada wagaine.

17 Dewa koyona matatabuna ani koyona, aku tamo koyona ani keke gina nauwe alika-vagata wagaine.

18 Ide kaalamanena badi gavega itubuga Yaubada wagaine ani keke koyona ida faifaisewa ayo ida naunauwe tova manamanawena, faina Yaubada Natuna giyavayavadi† e ada banae kaliva koyona Seitani keke gina kivekoyo.

19 Ada kaalamanena ideyavo Yaubada natunavo, ada tomiyababi moyaidi ani kaliva koyona Seitani yana veimeya dibune imiyamiya.†

† 5:13 Iyo 20:31 † 5:14 Iyo 14:13, 1Iyo 3:21-22 † 5:16 Iyob 42:8

† 5:18 Iyo 17:12 † 5:19 Luk 4:6

²⁰ Ada kaduwe kaalamanena Yaubada Natuna bademowa giobuelai ada alamana giveleda, e ada kana alamanena Banae Yaubada velemonoena. Ada ideyavo kaveseyana Banae Yaubada velemonoena wagaine, faina kaveseyana Natuna Yeisu Keliso wagaine. Banae ani Yaubada velemonoena ada Banae anakaibe yawai-vagata vuvuna.

²¹ Natukuweyavo, taumiyavo wana itaveyabimi yaubada fwayafwaya wagaidiya.

Iyayeku Iyoni

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2